

CIFRANAN PARADA GRANDI ORANJESTAD

DIADOMINGO 25 FEBRUARI 2001

Manera tur aña colega Juby Naar ta copila cifranan relaciona cu paradanan di Carnaval di nos isla. E cifranan ta loke e ta ricibi di lidernan di grupo durante paradanan, registra cerca huradonan durante parada, y compara cu cifranan di registracion na SAC. E cifranan ta pa anualmente por haya un idea di progreso of no di nos carnaval pa locual ta participacion di carnavalistanan den parada, pizanan, carosanan, y musica. E intencion di participacion na parada di Playa, segun cifranan di inscripcion na SAC na 2001 tabata 3116 y a participa 3125. Ta prome biaha den tanto aña cu e participacion a surpasa e registracion y e aña aki cu 9 persona. Den mayoria di aña e participacion ta mas abao cu e registracion.

Por ripara cu e aña aki e expectativa tabata cu cifra record lo a wordo logra, sinembargo e no a resulta pa gana cifranan di 1994 cu den ultimo decada tabata esun di mas grandi. El a surpasa si e cifra di 1999 cu tabata aña di e di 9 lustro. E cantidad di gruponan a keda mescos. Na San Nicolas tabata tin 1 grupo mas cu ta Johnnie Walker, cu no a presenta na Playa. Bandanan musical a aumenta pa record di ultimo decada Brassband a cay y keda pega na 2, SoundSystemnan a cay.

E cantidad di roadpiece no a kibra record di 1994, pero a aumenta hopi atrobe. Carosanan a resulta 2 mas cu ultimo añanan pero menos cu e 16 di 1996. Steelband a keda na solamente North Stars. Mester menciona sinembargo cu ultimo 3 aña a nota cu mas y mas e gruponan ta usa mas bodypiece cerca nan miembronan, y e aña aki a conta un total di 119 bodypiece riba caya di tur e gruponan hunto. Un remarke cu ta haci aki ta cu hopi hende no ta distingui kico ta bodypiece y kico ta shoulderpiece y ta usa shoulderpiece como bodypiece di manera cu awe ta papia di bodypiece y no ta menciona shoulderpiece cu ta e pieza di disfraz cu ta sali for di riba schouder.

	1994	1995	1996	1997	1998	1999	2000	2001
Participantenan	3401	2493(2893)	2019	1772	1830	3085	2701	3125
Gruponan	23	22	21	13	14	14	14	14
Bandanan musical	15	12	12	10	11	14	15	17
Brassband	4	5(8)	4	5	3	4	2	2
SoundSystem	11	8	6	5	4	4	5	4
Roadpiece	90	48	37	47	43	47	38	51
Carosa	11	15	16	4	9	10	10	12
Steelband	2	1	0	0	1	3	1	1

Den parada na Playa e aña aki por a nota ademas di vehiculonan cu ta lastra carosanan y bandanan musical, tambe presencia di 7 Van, 5 pickup bar of di utilities, 3 jeep-bar (1 di utilidad), un 4-wheeler, un motocicleta cu bandera di Aruba y 9 trailer-bar, 1 truck-carosa bar di Mariniernan. Mayoria di trailernan no tabata decora manera mester ta pa carnaval. No ta decora tampoco e otro vehiculonan pa nan presencia den parada ta mas carnavalesco. Di e cifranan di participante por ripara 2 cifra na 1995 pa participantenan y pa brassband. E cifra chiquito ta di localnan cu a participa den parada. Cu participantenan di Venezuela cu 3 di nan brassband, ta duna e di dos cifra cu ta mas halto. 5 brassband tabata di Aruba, 2493 participante tabata di Aruba.